

長蘆鹽法志

總目

卷一

諭旨一

卷二

諭旨二

卷三

天章一

文 聯額 詩

卷四

天章一詩 恩賞文詩墨刻

卷五

盛典

卷六

優恤 恤商 恤竈

卷七

律令 律例 考成 緝私

卷八

場竈

卷九

轉運上

引地引額附運道

引名

引式

引目

卷十

轉運下

學配 鹽價
南轉運表

融銷

順天直隸轉運表

河

卷十一

賦課上

商課

徵解

奏銷

交盤

卷十二

賦課下

商課目

商課表

竈課目

竈課表

卷十三

職官上

官制

職掌

卷十四

職官下

官表

易官表

卷十五

奏疏上

卷十六

奏疏下

卷十七

人物

忠節

孝行

貞女

友義

文學

選舉

附學額

節

節

卷十八

文藝 文 詩 紀恩詩

卷十九

營建 行宮 海河樓 皇船塢 浮橋 撥
船 衙署 學校 廟宇 捐施

卷二十

圖識

附編

援證一

歷代優恤

援證二

歷代律令

援證三

歷代場竈

援證四

歷代轉運

援證五

歷代賦課

援證六上

歷代職官考

援證六下

歷代職官傳

援證七

歷代奏疏

援證八

歷代人物

援證九

歷代文藝

援證十

歷代營建

附古蹟

長蘆鹽法志附編

援證九

歷代文藝

支

官自賣鹽議

唐 韓愈

穆宗時戶部侍郎張平叔議權鹽法敝請官自賣鹽可以富國詔公卿議中書章處厚兵部侍郎韓愈條議以爲不可其畧曰平叔請令州府差人自糶官鹽可以獲利一倍臣以爲城郭之外少有現錢糶鹽多有雜物貿易鹽商則

無物不取或賒貸徐還用此取濟兩得利便今令吏人坐
鋪自賣利不關己罪則加身非得現錢必不敢受如此則
貧者無從得鹽自然坐失常課如何更有倍利又欲令吏
人將鹽家至戶到而糶之必索百姓供應騷擾極多又貧
家食鹽至少或有淡食動經旬月若據口給鹽依時徵價
官吏畏罪必用刑威臣恐所在不安此尤不可之大者平
叔又云浮寄奸猾者轉富土著守業者日貧若官自糶鹽
不問貴賤貧富四民僧道并兼游手因其所食盡輸官錢
并諸道軍諸使家口親族遞相影占不曾輸稅若官自糶

鹽此輩無一人遺漏臣以爲此數色人等官未糶鹽之時從來糶鹽而食不待官自糶然後食鹽也國家權鹽糶與商人商人納權糶與百姓則是天下百姓無貧富貴賤皆已輸錢於官矣不必與國家交手付錢然後爲輸錢於官也。

上文彥博書

宋蘇軾

熙寧八年以章惇爲三司使謂河北鹽無權禁乃祖宗一時誤恩請遣使與兩路轉運司度利害行之蘇軾因而上文彥博書言利害其畧曰陝西之鹽與京東河北不同解

池廣表不過數十里。旣不可捐以與民。而官亦易以籠取。青鹽至自虜中。有可禁之道。然猶法存而實不行。城門之外。公食青鹽。今東北循海皆鹽也。其欲籠而取之。正與淮南兩浙無異。軾在餘杭時。見兩浙之民。以犯鹽得罪者。歲至萬七千人。而莫能止。奸民以兵杖護送。吏士不敢近者。常以數百人爲輩。特不爲他盜。故上下通知。而不以聞耳。東北之人。悍於淮浙。遠甚。平居椎剽之奸。常甲於他路。一旦權鹽。則其禍未易以一二數也。由此觀之。祖宗以來。獨不權河北鹽者。正事之適宜耳。何名爲誤哉。及紹聖中。章

惇爲相，仍行禁權河北。自惇禁後，至靖康之末，盜賊愈多。內帑益耗，皆鬪利之貽害也。

新倉鎮改寶坻縣記

金 劉晞顏

神都全有禹貢冀州之域，星文箕尾之分。虞舜時爲幽州，夏時省幽併冀。周初復爲幽州，召公分上爲燕國。秦始皇併天下，制三十六郡，以幽州土宇爲上谷郡。歷漢魏下至隋唐以來，或爲燕國，或爲廣陽國，或爲涿郡，或爲范陽郡。郡國廢置更易不常。唐末劉仁恭帥燕，爲其子守光所囚。據其地，僭稱燕，因置蘆臺軍於海口鎮，以備滄州。後唐莊

宗命其大將周德威破燕軍於平岡。復收蘆臺軍。同光中。以趙德鈞鎮其地。十餘年間。興利除害。人共賴之。遂因蘆臺鹵地置鹽場。又舟行運鹽。東去京國一百八十里。相其地高阜平潤。因置榷鹽院。謂之新倉。以貯其鹽。流衍於民間。因其鹽曰榷鹽。復開渠運漕鹽。貨買於瀛莫間。上下資其利。遂致饒衍。贍於一方。清泰三年。晉祖起於并汾。以遼主有援立之勞。因父事之。遂以山前後燕薊等一十六州遺於有遼。遂改燕京。因置新倉鎮。廣榷鹽以補用度。爾後居民稍聚。漸成井市。遂於武清北鄙孫村。度地之宜。分武

清澗縣三河之民置香河縣仍以新倉鎮隸焉皇朝奄有天下混一四海天德間建議令茲盡以遼宋故地合爲一家會寧興王之地朝廷在焉而尤近東偏凡在經畧之內地則遠近不一事則繁簡不同乃詔建都於燕京於時畿內重地新倉鎮頗爲稱首直以權院自趙德鈞始以來歷遼室迨及本朝二百年間綿綿不絕每歲所出利源源不竭以補國用故也主上中興撥亂反正思補正隆殘弊每以調度究懷以權鹽課利浩大其監守之官業嘗以散官雖品秩至有幾於三品咸以流外當之迺命有司改權

鹽院署置使司陞爲五品設副使之官兼從俸秩視諸刺
郡以重其事於時居人市易井肆連絡闐闐雜沓翁伯濁
質張李之家皆以世業底富加之河渠運漕通於海嶠篙
師舟子鼓楫揚帆懋遷有無泛歷海岱青兗之間雖數百
千里之遠便風漉旬而可至其稻梁黍稷蟹魚鰕鮓不可
勝食也而有河渠左界灤水右纏潞曲薊北名山無不委
曲而貫通之雖斧斤不入山林而材木亦不可勝用也其
富商大賈貨置叢繁旣遷旣引隱隱展展然鱗萃鳥集鬻
者兼贏求者不匱犬率資魚鹽之利其人烟風物富庶與

夫衣食之原其易如此而勢均州郡雖古名縣不是過也
人情揆之不列縣治殆爲失稱夫定十有一載辛卯冬至
郊天後鑾輿東巡幸於是郡歷覽之餘顧謂侍臣此新倉
鎮人烟繁庶可改爲縣第志之明年有司承命析香河縣
東偏鄉間萬五千家爲縣以權鹽歲入國用方之天下十
一謂鹽乃國之寶取如坻如京之義命之曰寶坻列爲上
縣著於版籍是歲春季天官爲除令丞簿以典其事於時
坊郭居民千有餘家自餘村間著爲四鄉東曰海濱南曰
廣川西曰望都北曰渠陽其坊正里正胥吏應廉從人數

列同上縣。粵有縣令振威將軍王禔。來尹是邑。縣丞忠武校尉李願。主簿儒林郎李拱昌。縣尉昭信校尉孫告中。參豫運判以備其職。先是新倉鎮權鹽處其西。其東則永濟務有永鹽之號。亦別更爲使司。與權鹽對峙而角。遂規規然犬牙爲強弱。每歲地官第其課績增損。以殊殿最。朝廷病其乖戾不一。因校售利害。併永鹽於權爲一司。歲入課利。通計一百三十餘貫。仍署爲寶坻鹽使司。於時縣治尚百務草創。未有公廨。縣僚乃相地之宜。稍於渠水之南。大覺招提之西。卜爲縣廨。招提之東。縣丞主簿公署次之。又

於縣北郭郭之外下尉廳焉其所經費仍具辭牒聞於地
官皆請給之乃營建間吏民鼓舞莫不子來人百其勤賈
有餘力而樂爲之用不一二年間令丞簿公廩皆以卽敘
其廳舍廊廡高宏壯麗皆畧有可觀自餘畿內諸廨無出
其右者爾後之專求可多云時里中豪右嘗欲礱石以刻
其事迭來懇求爲文於子至於義不可辭非欲文其事以
紀其實焉

三义沽創立鹽場舊碑。

元翰林學士

王鶚

洪範五行其一曰水水曰潤下潤下作鹹鹹也者其鹺之

謂歟。夫水爲五行之首。而鹽爲五味之先。可以便民。可以益國。國之益。民之便者。豈淺鮮乎。唐虞三代。澤梁無禁。未聞有拘權之說。逮至春秋。齊人管仲始議伐菹薪。煮水爲鹽。口計而徵其直。漢晉而下。因之取利。設官置竈。旁及遠方。雖蒲池之所自產。益井之所自出。莫不有課額焉。唐稱劉晏。斂不及民。而用度足。時河朔用兵。天下之利。鹽居其半。鹽之利。其亦溥哉。國家創制事。從簡易。燕京所轄。有縣曰寶坻。蘆臺。越支。疇昔之鹽場也。曰三义沽。則未之聞。甲午之秋。三义之地。未霜而草枯。灘面寬平。鹽鹵湧出。或經

日白生時人指以爲瑞遂相率訴於官按驗得實受旨煎造初得舊戶高松謝實十有八人歲不再易招徠者日益衆河路通便商賈往來是年辦課五百餘錠比之他場幾倍之無何康定之後爲勢家壟斷竈戶工本例不給資折以無用之物故戶皆貧窶借不能償至元二年朝廷擇人受任以中書省左右司郎中倪德政爲禮部侍郎兼司陂職公革去弊政善政日新成績上聞陞中都路都轉運使官大中大夫仍以提領稅課司答木丁同知使事寶坻鹽使曹嚴臣副之授任之後涖政清嚴以恤民爲急有功必

賞有罪必罰。竈戶歲給一一均及。殊無折支諸物之弊。有司租調。彼亦欣欣然輸納。自餘無絲毫科斂。由是人得安業。鹽窩山積。於今三年矣。前副使王進及耆老夏慶溫。資甫梁溫全。崔居仁。採輿人之誦。數來過。願得一記。刻諸堅珉。以爲後來者之勸。予初難之。復因老宿懇禱不已。乃嘉進等能事其事。而不忘大中指授之功。故撫其實蹟爲書之。且告之曰。活之場業已成矣。而今而後。更能恪然守其職。以安其屬。則國家懋賞。自有不次之用。予將大書屢書。不獨一書而已矣。

上鹽場圖詩畧

明刑部侍郎

彭韶

自古聖帝明王莫不以稼穡艱難爲念忠臣賢士亦莫不以敷陳民事爲先故有書豳風無逸以進者有進農桑耕織圖者有獻流民圖者要之期於深宮之中寓目動心不至視民如草芥矣然庶民之中竈戶尤苦惜乎古今未有圖詠臣近履鹽場始識其概海鹽煎熬全資竈戶雖有等分業產蕩然糧食不充安息無所未免預借他人所得課餘悉還債主艱苦難以言盡小屋數椽不蔽風雨粗粟糲飯不能飽餐此居食之苦也山蕩渺漫人偷物踐欲守無

人不守無入。此蓄薪之苦也。曬淋之時。舉家登場。刮泥汲海。流汗如雨。隆冬。砭骨。亦必爲之。此淋鹵之苦也。煎煮之時。燒灼薰蒸。蓬頭垢面。不似人形。酷暑如湯。亦不敢離。此煎辦之苦也。寒暑陰晴。日有課程。前者未足。後者復來。此徵鹽之苦也。客商到場。無鹽抵價。百端逼辱。舉家憂惶。此賠鹽之苦也。疾病死喪。尤不能堪。逃亡則身口飄零。復業則家計蕩盡。去住兩難。安生無計。所宜加意矜念。遇事寬恤。彼將感動欣慰。雖困極無復恨矣。臣今繪圖賦詩以進。

重修滄州文廟記

明巡鹽御史

鄧直卿

夫天下之風俗繫於士人士人之行檢關於教化學校者教化本源之地所以育材論秀而登諸用者也。用惟其人則風俗美。天下治矣。是故有世道之責者恒於學校加之意焉。滄州儒學在城外南一里許中遭兵火前御史余君修之弗竟厥功。因仍歲久益就荒陋。予以巡歷抵州。晉謁文廟。旣而周視學宮深惟弗稱。是懼於是權宜區度爰得罰鍰百餘兩。運使郭君五常以學徒多出鹽籍。又捐俸助其不足。乃命學正方宗重訓導陳憲邵東周共司其事。義民王珍素以能幹名。僉舉之。俾監督焉。經始於秋八月。暨

冬十一月落成。子以是月復至州詣學。則見內而殿廡。翼
然聳於矣。小而半也。郭然充拓矣。前而櫺星門。葺其摧折。
峙然竦立矣。後而明倫堂。齋居號舍。迄於膳所。撤陳易新。
秩然有序矣。二司訓宅。舊極狹隘。迺鼎增厥宇。垣墉傾圮
者。迺循其堵以築。赤白漫漶。迺罔弗修。煥然其改觀矣。問
其財用。則儉於前之金。無取益也。問其工力。則出於雇募。
無勞民也。蓋司出納者。按估而市。稽料而給。董修造者。用
不濫財。工不曠役。夫是以財費省而績效多也。爲之未幾。
成之孔速也。因進師生語之曰。營建細務也。得人而理之。

且易。况天下國家之大。有不需於得人乎。得人自士始。得士自教化始。今之教化何如。爲師者。案人責跡。或不知所以爲教。爲子弟者。華言麗辭。或不知所以爲學。不知所以教。則日所從事。溺於詞章焉爾矣。不知所以學。則時將効用。流於功利焉爾矣。古人之學仕。不如是也。善學者。反諸身心。可以體驗於屋漏。以審其幾。講貫於羣居。以訂其惑。允迪於倫理。以致其實。不矜於浮氣。以養其恭。不膠於末俗。以擴其識。不畫於己至。而求其所未至。以遠其到。無時無處。無勸怠焉。以常其功。由是而發於文詞。見諸事業。則

膏沃光華。本深末茂。視古之學與仕。庶幾其無愧也。如是士得而爲天下國家用。則尊主庇民。移風易俗。隆古之治。亦庶幾其可跂也。有士如是。而出於滄州。人將曰。是士也。滄州之學之士。匪直鄉邦之光。學校與有榮焉。否則輪奐之美。瞻視之間焉爾。非吾儕所以新學之意。非所以期望於諸士也。於是學正方子乃登拜嘉。請鑿諸石以詔多士。遂書而歸之。

創置滄州學田記

明按察副使

王顯仁

國家建學養士。懸之廩餼以示優。設之科目以進取。恩至

渥哉。又安所事田者。田以學名。蓋司佃於學。而歲收其租。以周士之膏晷不繼。婚葬不舉者也。滄州舊無學田。有之。自今日直指余公始。我朝設運鹽司者六。長蘆其一焉。與州治同城而居。每都漕使者行部。必先按漕滄州。以故士之被陶成而沾恩澤者。視他郡邑尤深。如燈油之給書院之建。賑貸之頒。諸所爲作興士類者。匪一朝一夕矣。獨念學田未置。無以植恒產而貽遠謀。督漕直指余公。乃深從馮貳運之請。發鹽課羨金若干。令創置學田。會郡守何大夫初政。方汲汲於品隲薪樞。作養人材是務。遂捧檄色喜。奉

行恐後亦捐俸金若干。連直指所發者共計若干金。置學田若干畝。召民佃種。計畝收租。如所謂困膏晷艱婚葬者。咸取給焉。事既竣。諸博士弟子請記不佞爲不朽圖。予慨然嘆曰。吾滄多士。其有厚幸乎。夫事必待人而興。亦必待人而成。二百年來。建節旄而司疆土者。不知凡幾。乃學田寥寥無聞。豈其力不贍哉。蓋由當事者未嘗加意也。余直指公力行古道。主持於上。而馮或運。州大夫。協心共濟焉。故一措置而士得永賴。夫非一時之奇邁與。第上之周士也。以田而士之自養也。以道士誠以道自養。修禮以耕之。

集義以耨之。異日者樹德樹業以粒食蒸民康阜海宇。斯無負上人加恩之意。不然且爲茅塞爲稂莠矣。烏用是田爲哉。願博士及弟子相與勗之。直指諱懋衡號少原新安之婺源人。貳運諱學易號乾所天台之臨海人。大夫諱應彪號寓藩四明之慈谿人。用是勒石以示永久且防豪右之侵奪者。萬曆三十三年建。

天門書院記

明吏科給事中

楊廷蘭

天門書院者。予同里畢誠叔甫之所經始也。誠叔甫以權鹽使者。巡行畿之南北。諸所擘畫。若豐國課。峙邊儲。疏利

源通商旅業井井矣。顧念畿輔八郡。我國家規方數千里之地。而生其間者。多豐綽博大智勇沉幾之士。究其所用。真社稷之幹也。夫國有可效之才。而不獲以士顯。士有可以靖獻之日。而不獲以學用。此無異故。有司不素養之過也。藉令乘有餘捐不急以養士。反經以示之趨。羣萃州處以培之肆。必有出於其方而宣力王室者。若榛栗杞梓然。作之屏之修之平之數十年後。豈無茹其實發其響者乎。乃下令有司。諸守令博士弟子員皆言古者化洽文熙。莫不崇儒置學。猶悼序黌不廣。令得視精華實息之地。增置

書院濟南閔子伏生河間毛公董相及孔安國梁統諸人
史冊爛焉其軼事可概見也輓近世操之若束濕薪舍此
不講矣若毛董諸賢非此鄉之先物哉而諸商等不無浸
浸乎嚮往之也公遂捐贖相土鳩工庀材向離爲門修廣
若干尺入門數武爲堂堂修廣若干丈堂後爲層樓樓修
廣若干丈又建諸生號舍若干間貯經史若干卷餼廩課
資給以贖鍰著爲令落成之日公率師儒以觀厥成且爲
之勸學闡洙泗之源揭孔曾之矩若採日虞淵而中天然
也者夫自學術分而政教始歧爲二故憂政則以詩書禮

樂爲老生之常談。而憂教則以繩墨事情爲俗吏之末務。無他。政不足以造微。則病教。教不足以周務。則病政。各相持也。交相蔽也。如寘蒞然。蒞愈豐。蔽愈多。天下始受其蔽。今誠叔甫不然。通商惠工。造士爲之。則飭憲貞度。反經爲之。歸是政之底績。而教成也。髦士式於化。而稱詩說禮。明揚天子之廷者。必足賴也。四民化於俗。而親上死長。以爲天子之金城者。必足任也。是教之底績。而政成也。今天下有崇極而圯國。有必窮之疑。朝有必爭之辨。野有贅恤之戚。罔有旒旗之痛。仁人之所憂。任士之所勞。志士之所憤。

萃此矣。而吾一言以蔽之曰。不知學。知學。則數十年之疑。千百年之辨。方二千里之捍禦。可斯須而決。可頃刻而定也。此非臆說也。可言之。而不可以行之。則聖學爲虛空無用之物。而考三王。俟百世。皆虛語矣。誠叔甫以學化士。以士化天下。葆於未斲之樸。澄於未汨之源。豐綽博大。智勇沉幾也者。斐然顧化。確然獨詣。學得質。而速肖。質得學。而善成。畿輔之地。其殆將有君子興其間乎。故非學不能使政教出於一。非政教出於一。不能化民以成於學。此誠叔甫嘉惠之微旨矣。誠叔甫誠心深識。獨觀於昭曠。其治

七鳳皇池元 一系文藝
一
巖臺可信傳者有挈令在不具志志其書院之本始如此
院垂剏會誠叔甫按事竣直指使者慎修甫偁公往代院
中事宜諸所未悉者慎修甫之經飭也尤幸得撫臺夢池
李公主盟道學雅志作人聞是舉而悅之蠲贖鍰如干爲
助備兵天津道許君錫甫協謀蒞基汪蔚翔甫踵至營度
周謹後先共濟適成樂育而運使何君繼高董其事運同
張君文奇判官尹君作賓與有賢蹟滄州盧君廷選綜理
最勞所當并記。

修復興寶神祠記

明青州分司

陳九功

國家設長蘆運司分司二。南曰滄州。運同領之。北曰青州。運判領之。滄州分司所轄九場。距使司六百餘里。而近青州分司所轄十一場。起嚴鎮。遵海而東。直抵山海關。距使司千里而遠。乃卜越支爲適中之地。建公署控馭之。傾其地僻且險。出大沽。渡海口。涉圍洵水泊。前此司官罕有至者。政弛而民益以偷。作奸翫法。無所忌憚。今上在位二十有一載。海氛竊發。軍興多事。御史姚公條議。謂青州分司宜更以運同歲一巡行駐劄。以釐弊而興利。議上可之。著爲令。時余方副運閩中。考滿而遷是職。泣任甫逾月。乃褻

糧東行遵制也。第序逼沍寒。由非孔道。食宿無所。抵舍間。關至越支。衙門先爲遊擊占據。貯火器。幾至圯廢。居旬日。亦可留矣。明年三月。復至蘆臺。偶見場西隙地數武。欲闢爲行寓。便棲止。詢之場官。則曰。此鹽公廟基也。余訝其名。摩碑而讀之。乃元平州廉訪使趙公鑄斯爲記。則知神爲聖母。非鹽公也。聖母始五代時。教民煮法。俄而化去。邦人神之。而祠所由肇。迨元大德間。趙公復加修葺。臺南一日。瑞鹽如雪。若然。則事神報本。固圖治者所宜先也。因僦居民廬。而修復神祠是務。募僧題簿。捐俸首倡。語在緣簿中。

商人高廉仙董翁然好義共成厥美且又以民廬齷齪棄官體於是衆議捐貲建公館焉中爲堂四楹前爲大門爲儀門後爲臥室胥吏有居廚廁有所翼如煥如視越支分司猶脣齒然此非余意余謂神不可以無依而彼則謂官不可以無舍無亦此心之相感有同然者乎工旣訖爲文以祭於祠是日也雨水驟注鹽池浸沒傭衆相率而歸次日霽池水皆凝爲鹽余艤舟將發商輩送之河澗奔告余曰適有異事往時雨後則無鹽而今之鹽不知何來但各傭已散欲倍其值募市人斂之而不能遠送矣此又與曩

者瑞鹽亦畧相似。非神赫厥靈有感而必應者乎。余懼始
事甚難。廢之甚易。向非廉訪趙公之記。則神祠故墟已湮
而無考。余今修復之。故特述其顛末。以俟無窮云。

創置先斯院贍田碑記。

明巡鹽御史 韓應龍

養濟孤貧守土者之責也。予督鹺。無民社寄。日奉大司農
檄。轉運兩關鹽務。微有天幸。引疏而課足。俾西北一帶。執
戟荷戈之士。盡騰飽無脫巾之虞。猶恐厥職未克稱。方今
災異頻仍。寇盜交誑。閭左十室九虛。當事者蒿目攢眉。憂
兵憂餉。余乃沾沾焉取無告窮民。而先欲濟之。無乃非當

務之爲急。昔人云。一介之士。苟存心於利物。必有所濟。何人斯。肉食而鄙。未有遠謀。上佐國計。乃下顧斯民。鳩形鵠面。甚至疲癯殘疾。日瞽天日不見。乃終歲不掛寸縷。不飽半菽者。所在多有。龍目擊而心悲焉。卽問分俸以賑。聊佐一時之急。而小惠未徧。其與幾何。已又思之。穴深尋。則臂之長有所不及矣。矧河水涸而思泣以益之。不憇甚耶。無已。就目前所見者。爲風雨飢寒之慮。惟有築舍以居。買田以養。在今日爲創制。於他年爲成規。卽所及無幾。亦聊以存吾利物之一念而已矣。去城百步許。御鹽廠右。原繫

長蘆官基環起一院。中立正廳三間。爲早暮賑窮君子散賑時駐節之座。東西北三面各建棲止貧民之屋八間。共計二十四間。每間安置鍋一口。蓆一領。被一床。榜其門曰先斯院。復捐俸銀四百三十五兩。置買生員王廷鑑馬里通莊莊房一所。小民竈地二十七頃六十二畝。折算行糧大民地一項三十六畝四分四釐。大竈地八頃六十七畝六分。在滄州孝二里行糧。雖非沃壤。頗繫良田。召募總佃李光輝。李開立曹尚言租種。無論水旱豐歉。每年納租銀一百兩整。按期給散貧民。又四十兩。交納滄州地畝錢糧。

取有李光輝等認狀在卷。生員王廷鑑賣契附卷。其爲地也。析之計二百七十三段。每段各有四至開列在冊。一切兼并竊據之弊。或可免矣。至於租種人戶。日久不無奸頑拖欠。所望後之君子。毋曰非當務之爲急也。一加意焉而已耳。存心利物。人人所同。當無俟余言之爲諄諄者。

詩

送高三十五書記十五韻

唐 杜甫

崆峒小麥熟。且願休王師。請公問主將。焉用窮荒爲。飢鷹未飽肉。側翅隨人飛。高生跨鞍馬。有似并州兒。脫身簿尉

中始與捶楚辭。借問今何官。觸熱向武威。答云一書記。所愧國士知。人實不易知。更須慎其儀。十年出幕府。自可持旗麾。此行旣特達。足以慰所思。男兒功名遂。亦在老大時。常恨結歡淺。各在天一涯。又如參與商。慘慘中腸悲。驚風吹鴻鶴。不得相追隨。黃塵翳沙漠。念子何當歸。邊城有餘力。早寄從軍詩。

送當塗趙少府赴長蘆

唐李白

我來揚都市。送客回輕舸。因誇楚太子。便覩廣陵濤。仙尉趙家玉。英風凌四豪。維舟至長蘆。目送烟雲高。搖扇對酒

樓持袂把蟹螯。前途倘相思。登嶽一長謠。

發白沙口次長蘆

宋黃庭堅

篙師救首尾。我爲制中權。掛席滿風力。如摧强弩弦。曉放
白沙口。長蘆見炊烟。一葉托秋雨。滄海百尺船。反觀世風
波。誰能保長年。念昔聲利區。與世闕周旋。大道甚閒暇。百
物不費捐。誰知目力淨。改觀舊山川。

阻風入長蘆寺

宋黃庭堅

福公開百室。不惜鄰國權。法筵森佛像。天樂下管絃。我來
雨花地。依舊薰爐烟。金碧動江水。鐘聲到客船。茗椀洗昏

垢經行數阻年。歲寒風落木。故鄉嘉言旋。舟回負赤子。白
璧乃可捐。侍親如履冰。風雨送晴川。

宿長蘆

元 薩天錫

柳花漠漠春歸寺。柳色青青晚渡江。屋角松聲撼風雨。道
人一夜不開窗。

憫鹽丁

明 郭五常

煎鹽苦。煎鹽苦。瀕海風霾恒弗雨。赤滷茫茫草盡枯。竈底
無柴空積滷。借貸無從生計疎。十家村落逃亡五。曬鹽苦
曬鹽苦。水漲潮翻灘沒股。雪花點散不成珠。池面平鋪盡

泥土商執支牒吏敲門。私負公輸竟何補。兒女嗚咽夜不
煖。翁嫗憔悴衣藍縷。古來水旱傷三農。誰知鹽丁同此楚。
我欲挽回淳古風。深慚調燮無絲補。且以仁煦摩。且以義
鼓舞。勿使心如墨。勿使政如虎。中和一致雨暘時。煎曬應
無當日苦。

舟次直沽與寶慶謝太守

明大學士 李東陽

二水斜通海。孤村合抱城。夜窗明月過。春浦暗潮生。憂國
身將遠。還家夢不驚。留觀有親舊。羈旅見真情。

龔渤海祠

明巡鹽御史

鄧直卿

德被人心不可忘。秉彝千載仰斯堂。亂繩解後牛爭放。單騎乘時劍已藏。諸葛祠前多碧草。召公庭下幾甘棠。高山不朽乾坤古。衛水東流澤與長。

長蘆道

明楊翥

秋色兼旬暑未捐。蓼花開遍亂鳴蟬。兒童嬉戲清陰裏。室屋鱗鱗傍水邊。

蘆臺玉沙

明莊禕

蘆臺極目際平沙。利博誰憐害亦賒。土面刮來淋玉液。鰲頭沸盡結銀花。十年預借償逋負。尺地堪耕屬勢家。安得

調羹知此味。免教流棹到天涯。

晚泊長蘆

明舉人

趙完璧

晚泊長蘆月涼生瀛海。風雲川淒暮笛。岸葦泣寒蛩。酒盡空明裏。詩成欸乃中。天涯浮桂棹。星畔老槎翁。

長蘆南樓成

明

王國寔

誰成樓閣繼當年。面水襟城勢屹然。數與時羸宜復古。地因人盛迥非前。聲來咫尺千舟艣。影入微茫萬竈烟。薄宦異時經梓里。定教駐馬幾揮鞭。

舟至直口

明
宋訥

旅思搖搖嗜晝眠。舟人報是直沽前。夕陽野飯烹魚釜。秋水蒲帆賣蟹船。詩有白鷗沙上興。書無青鳥海東傳。老爲聲利閒驅遣。少讀南華四五篇。

朗吟樓

明舉人 趙光宇

地非巴郡地。樓亦岳陽樓。牖敞含雲水。檐虛宿斗牛。客爭一眺望。仙定數遨遊。願識真人貌。尊中道可求。

浣花洲

明進士 劉生和

新秋暑氣未全回。別墅重承袁紹杯。停板何妨仍舞袖。攜尊不厭數登臺。風翻翠沼紅香度。日落青林白鳥來。寫入

景中吾有意。却思陶謝愧無才。

次直沽

明瞿祐

長川波浪去漫漫。直指東南送客還。
潮水四時來海上。天河一派落人間。
挂帆商舶秋風順。曬網漁翁夕照閒。
暫倚船窗遙望處。青螺數點見前山。

何公德政碑

戶部尚書錢象坤

瀛州千里控海王。熬波出素供天倉。
厥賦羸縮隨官方。誰堪鼓篴惠此商。
公守福兮廉幹揚。帝渙新令比臬長。
且懸異數酬其良。彼其之子鮮克當。
膏脂膩人氣不張。公獨臨

屬坐堂皇。秤掣期會莫敢抗。爬搔釐剔立五綱。聽商擇便沿海場。歲趣給引秋爲常。車載牛曳違農忙。費息利倍來攘攘。盜課十萬有五強。束脩不行尚書望。倒置功罪困以讓。鋪宮五萬洗其藏。驟令犒師具糗糧。商聞於橐走如狂。俄頃輻輳事克襄。戛戛飢鷹扼其吭。更搏乳虎柔銀璫。柏樹青青傲晚霜。蓮花不染水中央。捐羨斃城屹瀛滄。築室造士粥饑荒。鹽官或謂百斯箱。官居八載惟空囊。閱世已久民愈康。以祀以報貌煌煌。余昔計偕出其鄉。今來祠下遡流光。黃金有盡仕有量。惟德在人永弗忘。春秋伏臈走

其旁斷石垂詩海與桑。

前題

巡鹽御史

喻思恂

滄海蕩蕩百谷歸。高賢愉愉民所依。雷震電耀生廉威。疏
淹平準淪浹微。八年不調罔嘘歔。固我封守賑我饑。大哉
德教施不違。蔚蔚菁莪承芳徽。金翹翠旄覲容輝。樂嘉旨
酒薦芳醅。經緯宵冥青元飛。永遺令則倬巍巍。

長蘆鹽法志附編

援證十

歷代營建

附古蹟

卯兮城

在滄州東南阜財場界。秦始皇遣徐福將童男女千人入海求蓬萊。置此城以居之。故名。亦名千童城。漢置千童縣。屬渤海郡。後漢靈帝時。改爲饒安。宋省爲鎮。

呂彭城

在天津城西北二十里。

麻姑城

在滄州北海豐場界漢武帝東巡祀麻姑於此故名。

幞頭城

卽故長蘆縣。今滄州也。漢置參戶縣。隋置長蘆縣。屬河

間郡。唐屬滄州。宋省。

角飛城

在天津城東卽漂榆故城。晉時石勒使王述煮鹽於角

飛卽此。

乾符城

在滄州東北八十里嚴鎮場界。本隋魯城縣屬河間郡。唐乾符初生野稻二千餘頃。燕魏飢民就食之。因以年號爲名。後周併入清池。宋初仍爲魯城縣屬滄州。尋廢爲乾符鎮。又爲乾符砦。金亦曰乾符鎮。

伏猗城

在鹽山縣韓村北利國場界。相傳築以防猗廬者。

軍糧城

在天津城東南七十里。元時海運屯糧之所。

黑堡城

在天津城西十五里。卽今稍直口。

長蘆鎮

在滄州故橫海軍清池縣。

海津鎮

卽今天津府城。元延祐三年置鎮。命副都指揮使伯顏鎮遏直沽。至正九年立鎮。撫司明永樂二年築城。立天津左右三衛。

乾符砦

在滄州故清池縣。

巷沽砦

在滄州故清池縣。宋政和二年。改曰海清。

三女砦

在滄州故清池縣。宋政和二年。改曰三河。

泥沽砦

在滄州故清池縣。宋政和二年。改曰河平。

小南河砦

在滄州故清池縣。

虹心隄

在蘆臺場。秦始皇所築望海處。

望海橋

在長蘆東四十里。

觀燈橋

在故長蘆鎮。

釣臺

在青縣北六里富國場子牙鎮。相傳太公避紂。居東海之濱。卽此。其傍有太公廟。宋時置砦於此。名釣臺砦。

望海市臺

在滄州東四十里。周穆王乘八駿東遊海上。築之以望海市。故名。

望海臺

在滄州東北海豐場界。一名漢武臺。南北有二。相去六十里。基高六十丈。漢武帝巡海上所築。唐貞觀十九年。太宗自高麗班師。入臨榆關。次漢武臺。顧問侍臣。對曰。此是燕齊之士爲漢武求仙處。臺餘基三成。旁有祠堂。瑩域。其地俯臨大海。長瀾接天。岸多峻石。奇險錯列。太宗刻石紀功而還。

武帝臺

在鹽山縣東北七十里海豐場界。此南臺也。

仙人臺

在越支場水巖山之上。有石刻圍棋爛柯仙人像。

漢王臺

在富民場。晉時漢劉恢爲渤海王所建。

文昌臺

在長蘆縣。先名狼爛臺。相傳周世宗築以爲邊墩。後建文昌祠於臺上。故名。

掠馬臺

在嚴鎮場

蘆臺

在天津東南百四十里。北近寶坻縣界。臺濱海。圍臺產鹽。白如玉屑。寶坻八景。一曰蘆臺玉砂。

鹽姥廟

在寶坻縣蘆臺場。五代時南北分據。幽燕之境。鹽絕者歲餘。忽有老姥語人曰。此地可煮土成鹽。傳其法。遂失所在。人皆神之。因建廟。曰鹽姥廟。後有人新其像。越日。

忽報臺南十里皎白如雪。約十數頃。厚積寸許。趨視之。則皆鹽也。居人競收之。有瑞鹽歌。遂稱爲聖母廟。

望海寺

一在利民場畢孟鎮西二十里。一在越支場宋家營西北三里。一在濟民場。

挂甲寺

在天津城東南十三里。相傳有帥兵者過此。挂甲於寺門。故名。寺有八景。曰拱北遙岑。鎮東晴旭。安西烟樹。定南禾風。吳粳萬艘。天驥連營。百沽平湖。海門夜月。

水月寺

在長蘆觀燈橋東周廣順中建明宣德中移建於城北
鹽場東鄙正統中建千佛閣。

湯泉寺

在歸化場。

角山寺

在歸化場。

寶塔寺

在蘆臺場。

普恩寺

在嚴鎮場同居鎮元時建。

卧如寺

在濟民場。

吉祥寺

在石碑場。

崇福寺

在石碑場

五帝廟

在長蘆城西南明運使張雲翼建。

包公祠

在長蘆南關爲宋長蘆運使龍圖閣待制包孝肅公建。祠額移奉公神座於朗吟樓。又有公遺轎吏民愛而存之。奉於滄州分司署前土地祠。凡分司初蒞任。輒一乘還藏於祠中。時加修整。至今完好如故。

于公祠

在長蘆南關明宣德中于忠肅公清理長蘆鹽政。蘆人立祠祀之。

何公祠

在長蘆南關爲明長蘆運使何公繼高建。

瞿公祠

在長蘆西關爲明長蘆運使瞿公汝稷建。

張公祠

在長蘆西關爲明長蘆運使張公雲翼建。

永保觀

在長蘆南關明萬歷十九年設運學於此。後罷遂改爲觀。亦名昊天觀。

天門書院

在滄州城東明萬曆二十七年。饒使畢三才。運使何繼高。創建爲附近士子課藝之所。今廢。

朗吟樓

在長蘆西南三里。濱河樓上祀呂仙像。相傳唐開元中。有道士自號彭蠡主人。索滄酒千餘斗。飲竟。跨鶴而去。後人因構樓肖像以記其事。

附古蹟

渤海

長蘆卽古渤海郡。阜財海豐利國嚴鎮豐財蘆臺六場
皆濱海掘池截水曝之卽成鹽。

七里游

在歸化石碑二場之交。大海之外有沙磧望之如山環
水一區其中產魚最衆。

古黃河

在富民阜財二場之間。相傳爲古鬲津。今無水。惟兩岸
巍然河蹟猶存。

出龍河

在天津城南二十里。俗傳曾有龍出此河。故名。

鹽河

在深州海盈場。河濶百步。深丈餘。自冀州東開河等村。迤北通漳河。冬春常涸。夏秋水溢。或亦生鹽。故名。

豆子鹹

在天津城東南六十里。卽今鹹水沽。其地斥鹵廣數十里。傳爲昔時煮鹽處。

秦王島

在歸化場西南。相傳秦王蒲洪曾駐兵於此。故名。今島

已淪沒入海。

塌河淀

在天津城東北三十里。相傳有河隄塌陷爲淀。故名。周圍百餘里。

馬跑泉

在蘆臺場海隄北。相傳唐時兵過此。水鹹鹵不可食。馬跑地得泉極甘美。挹之不竭。居民因壘石其旁。至今取資焉。

甘井

在滄州故清池縣。唐開元中。令毛某母老。苦水鹹。無以養。乃於縣舍穿地。泉湧而甘。因名甘井。民謂之毛公井。

扳側井

在武帝臺下。相傳有行人飲馬者。遇村婦汲水。索其甕。弗得。遂扳側井以飲之。至今井口歆側。

通海井

在富民場。相傳井無底可測。因名通海。

竈兒坡

在滄州東北。居民於此煮鹽爲業。

馬落坡

在滄州東北。

蛤蜊橋

在富民場東南海灘中。積蛤成嶺。當潮汐之衝。潮至輒沒。潮平脊露如橋。其上通往來云。

將相鄉

在滄州東南。亦名程家林。唐橫海軍節度使程日華居此。世爲公侯故名。

夜球閣

在滄州東南。爲唐高適故里。因此閣居民遂謂夜珠高家。